

王勃 思归

长江悲已滞。万里念将归。
况复高风晚。山山黄叶飞。

卢照邻 曲江花

浮香绕曲岸。圆影覆华池。
常恐秋风早。飘零君不知。

韦承庆 南行别弟

万里人南去。三春雁北飞。
未知何岁月。得与尔同归。

宋之问 送杜审言

卧病人事绝。嗟君万里行。
河桥不相送。江树远含情。

张说 蜀道后期

客心争日月。来往预期程。
秋风不相待。先到洛阳城。

郭元振 子夜春歌二首

青楼含日光。绿池起风色。
赠子同心花。殷勤此何极。
陌头杨柳枝。已被春风吹。
妾心正断绝。君怀那得知。

苏颋^{tǐng} 汾上惊秋

北风吹白云。万里渡河汾。
心绪逢摇落。秋声不可闻。

张九龄 自君之出矣

自君之出矣。不复理残机。
思君如满月。夜夜减清辉。

王适 江上梅

忽见寒梅树。花开汉水滨。
不知春色早。疑是弄珠人。

东方虬 王昭君

北地无花草。春来不似春。
自然衣带缓。非是为腰身。

卢僊^{xiān} 南楼望

去国三巴远。登楼万里春。
伤心江上客。不是故乡人。

卢僊^{xiān} 途中

抱玉三朝楚。怀书十上秦。
年年洛阳陌。花鸟弄归人。

王维 乌鸣涧 云溪杂题

人闲桂花落。夜静春山空。

月出惊山鸟。时鸣春涧中。

王维 鹿柴

空山不见人。但闻人语响。
返景入深林。复照青苔上。

王维 竹里馆

独坐幽篁^{huáng}里。弹琴复长啸。
深林人不知。明月来相照。

王维 辛夷坞

木末芙蓉花。山中发红萼。
磻^{jiàn}户寂无人。纷纷开且落。

王维 山中送别

山中相送罢。日暮掩柴扉。
春草明年绿。王孙归不归。

王维 相思子

红豆生南国。春来发几枝。
劝君休采撷。此物最相思。

王维 杂咏

客自故乡来。应知故乡事。
来日绮窗前。寒梅着花未。

裴迪 宫槐陌

门前宫槐陌。是向敬湖道。

秋来山雨多。落叶无人扫。

李白 敬亭独坐

众鸟高飞尽。孤云去独闲。
相看两不厌。只有敬亭山。

李白 送陆判官往琵琶峡

水国秋风夜。殊非远别时。
长安如梦里。何日是归期。

杜甫 八阵图

功盖三分国。名高八阵图。
江流石不转。遗恨失吞吴。

孟浩然 送朱大入秦

游人五陵去。宝剑直千金。
分手脱相赠。平生一片心。

崔国辅 渭西别李仑

陇外长亭堠。山深古塞秋。
不知呜咽水。何事向西流。

崔颢 长干曲 三首

君家住何处。妾住在横塘。
停舟暂借问。或恐是同乡。

家临九江水。来去九江侧。
同是长干人。生小不相识。
下渚多风浪。莲舟渐觉稀。
那能不相待。独自逆潮归。

王昌龄 送张四

枫林已愁暮。楚水复堪悲。
别后冷山月。清猿无断时。

岑参 见渭水思秦川
渭水东流去。何时到雍州。
凭添两行泪。寄向故园流。

岑参 九日思长安故园
强欲登高去。无人送酒来。
遥怜故园菊。应傍战场开。

王之涣 送别

杨柳东门树。青青夹御河。
近来攀折苦。应为别离多。

王之涣 登鹳雀楼

白日依山尽。黄河入海流。
欲穷千里目。更上一层楼。

王之涣 储光羲 江南曲

日暮长江里。相邀归渡头。
落花如有意。来去逐船流。

王缙 别辋川

山月晓仍在。林风凉不絕。
殷勤如有情。惆怅令人别。

丘为 左掖梨花

冷艳全欺雪。余香乍入衣。
春风且莫定。吹向玉阶飞。

张旭 清溪汎舟

旅人倚征棹。薄暮起劳歌。
笑揽清溪月。清辉不厌多。

崔曙 雨中送客

别愁复兼雨。别泪还如霰。
寄言海上云。千里长相见。

于季子 项羽

北伐虽全赵。东归不王秦。
空歌拔山力。羞作渡江人。

薛奇童 吴声子夜歌

净扫黄金阶。飞霜皎如雪。
下帘弹箜篌。不忍见秋月。

韦应物 寄卢陟

柳叶遍寒塘。晓霜凝高阁。
累日此留连。别来成寂寞。

韦应物 答王卿送别

去马嘶春草。归人立夕阳。
元知数日别。要使两情伤。

刘长卿 春草宫怀古

君王不可见。芳草旧宫春。
犹带罗襦色。青青向楚人。

刘长卿 弹琴

泠泠七弦上。静听松风寒。
古调虽自爱。今人多不弹。

刘长卿 送灵澈

苍苍竹林寺。杳杳钟声晚。
荷笠带斜阳。青山独归远。

刘长卿 平蕃曲

絕漠大军还。平沙独戍闲。
空留一片石。万古在燕山。

钱起 江行

行背青山郭。吟当白露秋。

风流无屈宋。空咏古荆州。

刘方平 春雪

飞雪带春风。徘徊乱绕空。
君看似花处。偏在洛城东。

张继 登鹳雀楼

迥临飞鸟上。高出世尘间。
天势围平野。河流入断山。

顾况 忆旧游

悠悠南国思。夜向江南泊。
楚客断肠时。月明枫子落。

盖嘉运 伊州歌

闻道黄花戍。频年未解兵。
可怜闺里月。偏照汉家营。

李益 江南曲

嫁得瞿唐贾。朝朝误妾期。
早知潮有信。嫁与弄潮儿。

李益 扬州早雁

江上三千雁。年年过故宫。
可怜江上月。偏照断根蓬。

李益 洛桥

金谷园中柳。春来似舞腰。

那堪好风景。独上洛阳桥。

李端 溪行遇雨寄柳中庸

日落众山昏。潇潇暮雨繁。

那堪两处宿。共听一声猿。

卢纶 塞下曲

林暗草惊风。将军夜引弓。

平明寻白羽。没在石棱中。

月黑鴈飞高。单于远遁逃。

欲将轻骑逐。大雪满弓刀。

皇甫冉 送王司直

西塞云山远。东风道路长。

人心胜潮水。相送过浔阳。

皇甫冉 淮口寄赵员外

欲逐淮潮上。暂停鱼子沟。

相望知不见。终是屡回头。

司空曙 送卢秦珣

知有前期在。难分此夜中。无将故人

酒。不及石尤风。

柳中庸 江行

繁阴乍隐洲。落叶初飞浦。

萧萧楚客帆。暮入寒江雨。

戴叔伦 题三闾大夫庙

沅湘流不尽。屈子怨何深。

日暮秋风起。萧萧枫树林。

戴叔伦 关山月

一鴈过连营。繁霜覆古城。

胡笳在何处。半夜起边声。

严维 送人往金华

明月双溪水。清风八咏楼。

少年为客处。今日送君游。

朱放 题竹林寺

岁月人间促。烟霞此地多。

殷勤竹林寺。更得几回过。

武元衡 春日作

纵横桃李枝。澹荡春风吹。

美人歌白苧。万恨在蛾眉。

柳宗元 长沙驿

海鹤一为别。存亡三十秋。

今来数行泪。独上驿南楼。

柳宗元 江雪

千山鸟飞绝。万径人踪灭。

孤舟蓑笠翁。独钓寒江雪。

刘禹锡 视刀环

常恨言语浅。不如人意深。

今朝两相视。脉脉万重心。

刘禹锡 淮阴行

今日转船头。金乌指西北。

烟波与春草。千里同一色。

刘禹锡 秋风引

何处秋风至。萧萧送鴈羣。

朝来入庭树。孤客最先闻。

刘禹锡 别苏州

流水阊门外。秋风吹柳条。

从来送客处。今日自魂销。

孟郊 古别离

欲别牵郎衣。郎今向何处。

不恨归来迟。莫向临邛去。

张籍 寄僧

松暗水涓涓。夜凉人未眠。

西峰月犹在。遥忆草堂前。

令狐楚 从军行

暮雪连青海。阴云覆白山。

可怜班定远。生入玉门关。

王涯 闺人赠远 二首

花明绮陌春。柳拂御沟新。

为报辽阳客。流光不待人。

形影一朝别。烟波千里分。

君看望君处。祇是起行云。

张仲素 春闺思

袅袅城边柳。青青陌上桑。

提笼忘采叶。昨夜梦渔阳。

白居易 南浦别

南浦凄凄别。西风袅袅秋。

一看肠一断。好去莫回头。

白居易 问刘十九

绿蚁新醅酒。红泥小火炉。

晚来天欲雪。能饮一杯无。

元稹 西还

悠悠洛阳梦。郁郁瀟陵树。

落日正西归。逢君又东去。

张祜 河满子

故国三千里。深宫二十年。

一声河满子。双泪落君前。

张祜 江南逢故人

河洛多尘事。江山半旧游。

春风故人夜。又醉白苹洲。

张起 春情

画阁余寒在。新年旧燕飞。

梅花犹带雪。未得试春衣。

杨凌 贾客怨

山水路悠悠。逢滩即滞留。

西江风未便。何日到荆州。

杨凝 柳絮

河畔多杨柳。追游尽狭斜。

春风一回送。乱入莫愁家。

唐彦谦 小院

小院无人夜。烟斜月转明。

清宵易怊怅。不必有离情。

贾岛 剑客

十年磨一剑。霜刃未曾试。

今日把似君。谁有不平事。

沈如筠 闺怨

鴈尽书难寄。愁多梦不成。

愿随孤月影。流照伏波营。

潘佐 送人之宣城

江畔送行人。千山生暮氛。

谢安团扇上。为画敬亭云。

杜牧 江楼

独酌芳春酒。登楼已半醺。

谁惊一行鴈。冲断过江云。

李商隐 滞雨

滞雨长安夜。残灯独客愁。

故乡云水地。归梦不宜秋。

李商隐 钱席送人之梓州

莫叹万重山。君还我未还。

武关犹怅望。何况百牢关。

温庭筠 碧涧驿晓思

孤灯伴残梦。楚国在天涯。

月落子规歇。满庭山杏花。

许浑 早春忆江南

云月有归处。故山清洛南。

如何一花发。春梦徧江潭。

许浑 塞下曲

夜战桑干北。秦兵半不归。

朝来有乡信。犹自寄寒衣。

赵嘏 寒塘

晓发梳临水。寒塘坐见秋。

乡心正无限。一鴈过南楼。

施肩吾 湘竹词

万古湘江竹。无穷奈怨何。

年年长春笋。只是泪痕多。

李频 渡汉江

岭外音书绝。经冬复历春。

近乡情更怯。不敢问来人。

孟迟 怀郑洎

风兰舞幽香。雨叶堕残滴。

美人来不来。前山看向夕。

陆龟蒙 夕阳

渡口和帆落。城边带角收。

如何茂陵客。江上倚危楼。

皮日休 和陆鲁望

刻石书离恨。因成别后悲。

莫嫌春茧薄。犹有万重丝。

韩偓 效崔国辅体

雨过碧苔院。霜来红叶楼。

闲阶上斜日。鹦鹉伴人愁。

储嗣宗 早春

野树花初发。空山独见时。

踟蹰历阳道。乡思满南枝。

郑谷 望湖亭

湘水似伊水。湘人非故人。

登临独无语。风柳自摇春。

李收 或作牧 幽愤

幽人惜春暮。潭上折芳草。

佳期何时还。欲寄千里道。

蒋吉 石城

系缆石城下。孤吟怀暂开。

江人桡艇子。将谓莫愁来。

西鄙人 哥舒歌

北斗七星高。哥舒夜带刀。
至今窥牧马。不敢过临洮。

荆叔 题慈恩寺塔

汉国山河在。秦陵草木深。
暮云千里色。无处不伤心。

释灵澈 题天姥

天台众峰外。岁晚当寒空。
有时半不见。崔嵬在云中。

释贯休 闻笛

霜月夜徘徊。楼中羌笛催。
晓风吹不尽。江上落残梅。

洞庭龙女 与许汉阳

海门连洞庭。每去三千里。
十载一归来。辛苦潇湘水。

湘驿女子 题玉溪

红树醉秋色。碧溪弹夜弦。
佳期不可再。风雨杳如年。

安邑坊女子 幽恨诗

卜得上峡日。秋江风浪多。
江陵一夜雨。肠断木兰歌。